

A PROPAUS DELS JONHENTS

Seriá logic qu'un compausat de dos tèrmes o mai ne faguesson pas qu'un graficament. Avèm l'exemple d'autras lengas qu'escrivon sens jonhent los mots venguts corrents : *bedroom, pacemaker* (angl.), *enhorabuena, cortacircuitos* (cast.) *cassaforte, bassorilievo* (it.)... Per d'unes mots, l'occitan a pas escapat al fenomèn (*planpè, planponh, barbablanç, belfraire, belpaire, belasorre, padevin, palmacrist, adieusiatz...* ne son l'illustracion), mas aquò se pòt pas aplicar sistematicament, compte tengut de la multiplicitat de las combinasons possiblas. Aicí las nòstras causidas principales :

1°/ Escrivèm amb un jonhent :

- a) los compausats que correspondon a una frasa o que contenen doas accepcoes o dos tèrmes **plan diferenciats** : *lèva-matin, manja-quand-n'a, gris-jaune, bi-sexual, cinemà-vertat, clar-e-brun, aiga-sal, aiga-nèu...* e tanben las expressions popularas estereotipadas : *A-pas-qu'un-uèlh, Salv-m'i-ten / Salv-m'i-ten !, M'as-colhonat-quand-t'ai-vist, mal-m'agacha...*
- b) los compausats de dos verbs o de dos substantius que marcan una alternativa : *monta-davala, tira-butà, vira-revira, colca-lèva, jai-lèva, tomba-lèva, ziga-zaga, manja-dòrm, manja-caga, pissà-caga, pèla-manja...*
- c) los compausats de dos elements variables : *tot-nud, tota-nuda, tot-poderós, tota-poderosa, mièg-caluc, mièja-caluga, pòrta-vitra, pòrta-fenèstra, pont-levadís, radical-socialista, canhon-moton, rat-bufon...*
- d) los compausats d'elements repetitius o sinonims , los compausats e los derivats de punts cardinals, los compausats de « naut » e de « bas » (sens geografic) : *ric-a-ric, ripa-rapa, lèu-lèu, tifa-tafa, sica-saca ; patin-patan-pas res ; Sud-èst, Nòrd-oèst, Roergue-Sud, Sud-Avairon, sud-avaironés, Lengadòc-Bas, bas-Lengadocian, País-Bas* (mas Paisbassòl)...
- e) los compausats que lors prefixes *èx, quasi* ('kasi), *non, in...* forman amb lo mot combinat un mot autonòm : *èx-professor, quasi-monopòli, non-participacion, in-dotze, in-setze, in-trenta dos...* (mas véser 2°/ d)

2°/ Escrivèm sens jonhent e desseparats :

- a) sants, fèstas de sants, prenoms, escaisnoms e damnes : *sant Joan, per Sant Joan, Joan Loís, Maria Odila, Joan Pèire, Joan farina, Joan fotre, Joan salsa, Joan topin, Sala topin, Sacre Dieu, Sacre nom de Dieu !...*
- b) lo vocabulari de las plantas, dels campairòls e dels animals : *èrba de mèl, èrba curadents, blat negre, bleda raba, còl tòrta (violeta), mongilh ris, vira solelh ; sant miègula, pet de lop / bolet d'anèlh, bolet capnegre, bolet castanh, bolet pèpolit ; bernat pescaire, bernat pudent, papach ros, coa roja, còl tòrta (aucelum) ; mal armat, peis luna, bèl uèlh (peissum)*
- c) los compausats que contenen una preposicion o un article entremièg dos tèrmes : *lenga de pelha, pè de cèrvia, pèira de glaç, uèlh de buòu (obertura), Joan de léser, sauta en banca, sauta en l'aire, sauta l'ase...*
- d) las locucions latinas passadas en occitan : *ab intestat, ad patres, de facto, ex abrupto, ex aequo, ex catedra, ex libris, ex nihilo, ex votu, in extenso, in folio, in partibus, in plano, in quarto, in situ, ipso facto, ultra petita...*
- e) lo redoblament augmentatiu de dos adjectius : *comol comol, polit polit, menut menut, pichon pichon...*

3°/ Escrivèm sens jonhent e soudats la màger part dels autres, e los derivats de compausats, que sián compausats :

- a) *de dos substantius : fauqmargue, palferre, claupèire, escaisnom, escaisnomenar, lengamaire, mairelenga...*
- b) *d'un substantiu e d'un verb o d'un substantiu : capvirar, peltirar, còpacap, semblaboc, gratapapièr...*
- c) *d'un substantiu e d'un adjectiu o d'un adjectiu e d'un substantiu : capleugièr, morreponchut, barbablanç, barbagris, pèterrós, aigasenhadièr, blatnegrièira, malafam, miègjorn, miegjornal, bèrcadent, falsamoneda, falsmonedier...*
- d) *d'un prefix e d'un adjectiu o d'un participi passat : antinuclear, pòstescolar, semicircular, entrebadat, prefabricat...*
- e) *d'un prefix e d'un substantiu : preacòrdi, psicodrama, rèrenebot, subrepés, telecomunicacion...*
- f) *d'un advèrbi e d'una preposicion o de doas preposicions : çains, çaisús, cajós, çalcontra, senscontra...*
- g) *d'una preposicion e d'un substantiu : abansgarda, abanspropaus, sensabric, sensemplic, aprèsdinnada...*
- h) *d'un advèrbi (o d'una locucion adverbiala) e d'un verb : aïcisèm, paucval, paucvalum, paucparla, a la mantasta...*

N.B. 1. Quand la vocala finala del primièr tèrme es la meteissa que la vocala iniciala del segond, i pòt aver assimilacion : *pòrtaranha, pòrtavion, picauçèl, telaranha, toxinfeccion* ; dins d'autres cases tanben : *atmosfèra, atmosferic, semisfèra, semisferic...*

2. Mantenèm lo jonhent en cas d'incompatibilitat fonetica, grafica o semantic : *anti-ozòn, semi-arid, avant-train* (mas la simplificacion *avantraïn* es possibla), *cap-pelat* (cap-pelat es pas capelat, v. p.p. 225 e 223), *infra-uman, semi-anular, semi-arid...*

3. Es de notar que, de còps, i pòt aver una diferéncia de sens dins lo meteis compausat o non compausat, amb jonhent o sens jonhent, per ex. *non-res e nonrés* (*Aquela persona es un non-res. Tombar dins lo nonrés*) ; *cambrafreja e cambra freja*.

4. Per d'unes locucions o d'unes compausats la combinason dels tèrmes relèva pas exclusivament d'una sola categoria, per ex. *a la mantasta, a man tastas*, o per de tèrmes de 2°, b que, quand son al plural, passan a 1°, c : *mongilhs-ris, peisses-luna...*

Gairal - Cantalausa.

QUICÒM DE TIPICAMENT OCCITAN

Quand un substantiu existís a l'encòp al masculin e al femení, aicesta forma es pus bèla, pus fòrta, pus fina :

coberton, cobertoira	garbièr, garbièira	palabés, palabessa	panièr, panièira
cotèl, cotèla	pairòl, pairòla	palhièr, palhièira	burat, burata.